



蛟螭集卷之五

黎陽盧柟少樾著

雜體詩

伏雨嘆二首

陰陽薄盪雷雨急江峽出雲溪夜喧烟霏似與秋色遠黃鵠垂翅愁飛翻九壑溷穢不可住晞髮陽阿阻煙霧東走豈應還問津回頭變化空桑樹山雨下澍白紛紛憑高莫辯牛馬羣江寒自駭碣石浪日暮猶合蒼梧雲破厨濫釜烟水黑玉盤金鯉無消息直欲上天叫帝閤闔閭九重恐顛踣

史平臺夜宴詞

漢史玄以宣帝大母家封為侯於外家親居多
得賞賜簪貂珥世寵溢內外明浮丘山人作史
平臺夜宴詞

高堂膩燭嬌紅春麝爐掣鎖銀麒麟掌中舞袖回
金縷背後落花覆錦茵夜半歌鐘起洞房繡羅香
煖對鴛鴦旋徵玉鴈排箏譜復弄梅花近笛牀繡
額紅衿真媚嫵隔簾髮髻調鸚鵡喚回蒲座鬱金
香鮮鯽銀絲出翠釜雞人夜唱銅龍瀉內監忽傳
進挈馬絳綃雙引貂襜褕長秋門前馬不下北風

吹山海水移世人見此復淚垂寶玦香車俱莫嘆
金掌仙人已辭漢

苦寒吟

北風怒號河水折鑿冰慘淡鮫人窟琉璃應手忽
破碎天吳回首蛟龍血錦鱗撥刺入豪門鑿刀玉
釜飛紅雪馮謹夜坐食無魚彈鋏高歌氣未舒方
袍着凍冷如鐵嘯嘑霜霰攢兩眉星火不燃寒欲
死皮齧肉裂老無齒誰能醉解驪鬃裘別有權家
會戚里苦寒吟苦寒之吟不可聞古來傑士多餓
死何必垂首涕交紛

杜鵑行

杜鵑西飛隴水西羽毛搖落隨山雞雲空萬里不
得去藤蘿掩靄青烟梯當行鷓鴣向我笑鳳凰不
與同羈棲舊日同林鳶與鷓怒目烟視秋水哇東
海汗漫稀有鳥尋我三年窮路迷知是杜鵑向我
拜血淚不覺滿面啼口不能言臆相向似欲遠引
凌岷谿四郊孛且多隱壘獵火燒天喧鼓鼙寄語
燕山胡鴈婦慎勿往恐穿金鏹

快鵲行贈盧潭城宗弟

快鵲快鵲南山擊鳥北山灑血朝發秦隴暮宿荆

越凌厲橫視遊翔恍忽蜩鳩捨飛榆枋間仰面血
視無好顏人生得意且快鵲何用悠悠長閉關翟
公昔在蓬蒿下萬里清風減高價君今慷慨躡長
雲藉藉芳聲四海聞楊雄欲獻河東賦司馬先傳
喻蜀文醉吟快鵲行醒啣快鵲羽願君化作天池
鵬莫學快鵲棲巖樹

黃利黃謠

黃利黃黃利黃黃河岸上洗衣裳黃河流水鳴湯
湯幾時流到我家鄉

次童謠

山東綺雲雞刷羽來山西到處潛飲啄河梁借羈
棲江鶩野鴛欺予客怒目血雋動相扼紫翎蹉跌
金距愁碧葉輕翻香稻秋不如折翅歸故鄉五更
明月啼山丘

嶺峴謠呈張嶺山明府

朝乘五嶽鶴暮望十洲雲尋山不厭嶺峴遠笑謁
嶺峴入紫氛嶺峴名嶽天下聞巴江前繞接氤氳
翠屏巉巖斜軋幾萬丈玄猿夜嘯臨江濱馮夷水
仙何超忽凌風起舞嶺峴月蒼藤翳靄看不見欲
上嶺峴苔徑滑昔聞天台山峒嶢摩天關赤城起

霞色王喬時來還洞天已與嶺峴別爲說嶺峴生
汗顏嶺峴謠謠且遠仙茅千載留靈根玉葉金葩
待君飯君意詎可論恍若岷山源崩澍赴溟海聊
可比君恩生來未識嶺峴路此身幾日登嶺峴嶺
嶺謠謠未已早晚化爲嶺峴原上之青松常倚嶺
嶺望江水

芒屨謠

蒲葉青蒲花黃爲君採纈結成雙隨君步履入屨
廊芋羅山下君不返恨殺吳王輦路長

修武行贈李主簿

君不見修武城邊日欲暮西望岵嶢漢京路驛樓
閣道迥連雲花巘葉潭車馬駐車馬駐聽修武歌
裊裊秋風度黃河客懷衣上灞陵雨鄉思夢繞新
豐蘿乘時小作修武尉披襟靄靄流仙氣自言節
操凌南山直使風聲排趙魏使君稅駕是何年日
飲醇醪高枕眠山鳥隔簾下廳事對客髣髴鳴寒
絃城頭角聲星滿野城門落花隨去馬谿澗荒茅
留使君天風繫馬棠陰下父老垂涕前致詞使君
到來人不知今年詔書蠲租稅湏臾還見承平時
憶昔少年爲君舞共憐修武西山樹卽今望樹復

憶君悵嘆雲霄歌修武

信陵亭行贈張幕史

昔聞貴公子乃是信陵君劍氣連秋水英風邁長
雲堂中愛養三千士玉袍珠履何繽紛信陵一去
幾千載堂中今無一人在空餘城裏信陵亭日見
黃河走東海信陵亭右送飛鴻豪士者誰張長公
虬髯瀟灑眼如電論吐何啻垂天虹身騎宛馬鐵
花驄霜蹄決裂耳生風四顧已無南海尉一心要
滅黑山戎朝發夷梁津暮宿黎陽渚軒蓋狹廣路
翩翩皆龍舉春風澹蕩吹羅帷宛如淶水蓮花池

異代風流今有此若問信陵那可

樂府

出自薊北門行

翩翩羽林兒少學龍虎韜膂力過賁育英風擁行
旄展藝萬人謹上馬盤弓發怒揮魯陽戈倒刺寒
潭蛟腰懸繁弱弓仰射太行猱北出鴈門塞從軍
樹竒勞占轡李輕車應募霍嫖姚羽檄動邊序烽
火無昏朝分兵收廣武轉戰龍城郊投鞭澣海渾
結陣陰山高朝擒左賢王暮擣單于巢拓塞亘萬
里奪旗列千遭胡霜飛玉關漢月照銀袍疾風影

雲旂黃沙驚馬鑣天寒角筋勁墮指如剪蒿豈不
懷金閨畏此簡書遙仗義報明主殺身誠足要

前有罇酒行

春風吹水搖渌波春日輝輝上翠峩悠悠簾幕捲
芳草細細落花嬌綺羅胡姬嫵婉顰青蛾促絃急
柱爲君歌海水東流逝不返君今不飲可柰何

子夜吳歌

燕花敷錦繡楚舞醉羅裘明月空悲妾白雲常似
君不知遼海上書信幾時聞

古別離

鏡臺倚新粧羞復畫蛾黃羅衣蕩艷色落花空故
香登高望帝子蒼梧雲正長願托雙鯉魚錦字寄
沅湘

懷仙歌五首

崑崙山勢倚天嵬弱水千年四下迴花開王母三
桃樹雲擁周王八駿來

蓬海城高十二樓金銀花發近仙洲玉童贈與青
藜杖天女邀乘白鹿遊

綠髮雙鬟白羽裳眇無人識自騎羊宜時背癢尋
仙侶願借麻姑指爪長

丹崖石壁渺冥冥鳳嘯鸞歌狎廣庭王子吹笙應
有待相思遙寄赤松苓

玉樹長攀有所思仙人遙在海之湄木公醉飲千
鍾酒瑤姬齊唱萬年詞

碣石篇

蓬萊東望橫海水白波如山幾萬里巖前琪樹發
葱青遙見仙人綵雲裏麻姑欲過來何遲手把青
都綠玉枝願將此物寄南嶽相逢重獻萬年詞

隴水曲

隴山當面起隴水向西流中倉妾墮淚幾日到涼

州

涼州樂

月氏穹廬夜秋風起暮笳胡星沒鴈塞漢月湧龍
沙露滴葡萄酒天寒首霜花從軍莫浪譁轉戰屬
輕車

怨歌行

長安二三月紫陌競朱輪秀色金閨婦鉛華珠箔
春綺紈續雜逡鞍馬自逡巡青鳥銜瓊書飛入赤
城闈日暮荷寵歸文犀銀麒麟借問此阿誰大國
號與秦憶昔嬌小佇蘭房刺繡五紋雙鴛鴦星河

織錦度明月天孫剪綵分雲章願將賤軀開天笑
夜逐三星宿未央未央樂事多莫謂宜春好宮女
妬蛾眉容顏日衰老君恩從此弛棄妾青樓道青
樓大道繞秦川鳳管鸞絲徹九天太液紅蓮初映
頰瀛洲綠草已縈烟妾情慌忽如昨日那知恩斷
韶華年夢入彤樓夜金壺瀉春水髣髴接君歡晤
言竟非是閭闔浮雲萬里遙雲旂翠葆徒相邀詎
聞阿嬌貯金屋枉殺秦嬴吹玉簫寄語漢宮娃莫
倚顏如花君心難自保棄擲終泥沙妾容已自落
倡家妾心耿耿凌朝霞羊車竹枝待君御高唐雲

雨空淫哇君王欲較妾長短請看前朝張麗華

枯魚篇

枯魚枯魚爾身自白龍誰使爾爲魚一朝落泥沙
鱗甲生長蛆嗟嗟鯨鯢振鬣滄海吹嘘三山歛揚
鬼罪爾罪維斯死亦何悔誰能借風濤作書上天
帝雪此坳堂冤飛騰吸雲霓枯魚枯魚從此遐逝

折楊柳

春思結楊柳搖曳金窻煙東風澹蕩時吹落玉臺
前深閨別離婦感此心凄然沉吟毀青黛投淚謝
珠鈿攀條寄遠人引恨碧雲天微物豈足惜長懷

芳樹妍

怨詩行

秦戍樓荒君未還楚鄉秋早妾摧顏日寄情心與
明月相思何謝望夫山

丁督護歌

朝唵都護行暮唵都護歌都護逝不返妾當可柰
何妾年十五嫁夫君銀轂珠簾度彩雲還從佳賓
還四座刺繡鴛鴦羨五文高堂拜姑嬋清厨調菽
水日旭供華饌香風動紈綺二十長子孫雲媿滿
高門頗偕伯鸞志叙此向平婚詎意良人從逮獄

幽垣無分回天矚闔門骨肉盡草莽放室雞豚那
能促桂帳蘭薰知幾時鴉鬢凋髮爲誰綠妾身死
去無處所忍向何人說衷曲去年天使至籍錄發
良人中途不得語况復能相親今年一會回若墮
烟霧身執手無別言但訴寒與貧淹忽歲云暮已
非夢寐真東家女兒嫁商賈春去秋來不言苦何
似妾懷常相思萬恨千愁忍飢窶落葉反本根歸
雲常在山君身陷羅網經歲不復還豈唯君坎軻
所恨妾命慳妾非蔡文姬長跪解君死有女非緹
縈誰能見天子一唱都護歌再唱情轉深愁多不

爲牛山哀淚下豈有雍門琴君心若知妾腸斷願
化東南填海禽

少年行二首

長安俠客多少年醉歌擊筑南山邊相逢不避曾
勾踐一夜擲盧得萬錢

又

長安俠客矜年少青驪緩步章臺道相逢欲取胡
姬憐笑挾金丸墜飛鳥

東塘行

暮秋搖落金井煙瑤牕月出愁無眠請君四座且

勿嘆聽我試歌東塘篇東塘春風樂遊冶寶帶螭
盤驕白馬朝從狡兔上闌東暮鬪金雞長干下儂
家繡被金錯床逢迎七十紫鴛鴦生來孱小無人
見艷着荷花嬌上粧錦瑟春生鳳凰柱翠袖香凝
蛺蝶縷浮雲小駐緩聲歌花葉驚翻垂手舞眄眇
流波媚笑顏此時恩愛比南山那知輕薄易年少
一別迢迢隔玉關儂心歷落如秋草西風吹折江
南道江雲斷盡君不來會使蛾眉待君老東家買
得錦鱗魚中有傳情尺素書君身亦是臨江客何
惜相思一字予機中罷却流黃織爲恨東塘淚霑

臆寄語春陵遊俠兒莫學東塘負傾國

鳧墩有序

鳧墩有序張壚山明府兄長公也長公父疾

且篤醫莫引愈長公引刀割左股和藥進父病
立已有司聞之表薦明浮丘盧柟作鳧墩篇

東觀岱嶽西引鳧墩偃仰怙恃有如子孫解鳧墩

之容溫懿無他軫父之疴謹掄鳧里解白楊鏘鏘

矯若龍翔仰天一呼烈石飛霜解實毒我父寧知

我股盡血濺濺以淪以釜解父曰予膏啜此餽羹

殆其有瘳欵如已醒解稚笋之薦江魚之膳昔聞

太史今茲匪讀六荆蜀之鄉爰有銅梁篤是異人
刑我有邦解七

黃鵠篇贈羅封君就養還萬安

君不見黃鵠飄遙下太清天風接引銅臺城仙籬
啣羽遠相慰嘯舞不覺烟雲輕玉珮瑤鏘何所致
熒熒上刻瑤華字歸時持贈與盧敖萬里螺川恣
遊戲

相逢行

黎陽臨大道城北達城南相逢問令尹不盡使君
驂雪霽椿枝綠春融萱草酣荀何千載後獨此一

清瞻

胡鷹渡海來篇

鬱律山上雲飄遙雲間葉葉落尚有返雲去杳難
涉胡鷹渡海來將雛還飛去我欲因之執此鳥徘徊
流涕不忍顧長跪折矢一語可方客子周游情
同此傷天老介叅父母在幃雜珮繒錦玳瑁珠璣
杖屨陟降窺秦桃源仙姿玉度埃何能言陰符畫
設鬼神呵守至道不勝苔滋蝌蚪虞皇歷阪文后
岐隴永錫爾類揚名中州

閭闔篇

春日照城隅佳氣紛朱邱宮女三千人雲光晃羅綺且卷珠簾開直待雲車迴玉簫吹行雲飛下瓊瑤臺瓊瑤臺畔仙妃舞鳳鳥唱歌龍枹鼓天風渺渺動朱衣天女乘春散花雨綠萼花前細草茵玉階鏤斷金麒麟明朝騎爾朝上帝壽我四萬八千春

五言排律

甲辰歲張郡伯鄧西如覲京師其母太夫人

出中饋給囚囚感激述懷作五十韻以謝

鳳曆開皇紀龍池憶紫烟青陽調玉燭白日轉幽
天河朔風雲會渾涯氣槩先諸公梁苑客明府漢

庭銓沈宋金章籍陰何玉轡聯衣冠連日表精爽
動星纏各應非熊兆同操哲匠權文翁兼化蜀郭
隗始登燕五馬襄城野雙旌霸水漦夾輪雙鹿擾
上漢一槎縣忠獎推王室金泥受帝宣吳公才第
一賈誼席應前鄩善何無爾河源卽有焉疏名勒
玉藻歸院徹金蓮虎變谷風起鶯鳴喬木遷那微
文伯母誰產范滂賢黃鳥空玄理關雎德化全肅
雍元啓胤聖善揔承乾壺臬慈文表襟裾風紀綠
大家新著作劉向舊名編雨露含濡遠江河流澤
偏吹噓延朽腐哀痛及顛連粉署琅玕碧天牢桂

玉鮮八珍真麤鑿五醢更駢闐楚麥赤城外杯羹
玄圃邊春盤行荏苒曲机坐連翩眉睫光初潤膏
肓病卽痊尚方虛擬賜陰室兢相憐小步嬰金鐵
揚眉媿拘攣朶頤羣儼側染指竭夫筵坎廩心仍
切低回腹稍便循牆如喪狗冤頸似飢鳶慷慨期
投壁呻唵尚縮肩搶噀北向拜遙祝西華年少假
恩猶乳翻思淚下泉二靈忘伏臘兩稚飽鷹鷂丘
壠哀新鬼圖書鎖廢屢干戈嘗膽苦衰颯噬臍眠
故國孤魂杳他鄉白髮牽妻貧嫵再醮女大恹施
鉛放犬因無食挑針作覓錢塵埋蒼兕劔蟲篆白

蹙氈氈釜從蛛網幃幃或馬韉鬼神泣簡牘妖孽
戲花鈿壯志浮雲去灰心苦藥煎敢辭先菌蟪爲
恨失騰騫雷雨龍門別風霾虎脊捐徽纆多窘束
榜楚替迤邐百轉傷心曲三年似禍悛傾危希造
化早晚謝陶甄

暮秋承華主簿竹川饋飯奉謝凡三十五韻

衛上清秋暮寰中氛氣多草湮康叔國沙沒禹王
河瘠土分常貢蒼生病歲饑輓應梁地麥畚浸漢
江波盜賊綠邊颶喧呼動且回濟南鍾儁傑河北
待絃歌斷鵠揮虹劔揚兵躡海蠆黑山戎破膽白

馬將橫戈山鳥行廳事劣顏藉酒酡圖書盤海岱
詞賦入牂牁荒阪時鳴驥黃庭或換鴛鴦傳驄馬
客舊聽鳳凰珂敏察周窮儼殷憂達隱訛憐才無
近遠覆業惠征科中饋人間出殊恩天上過金城
酥比練翠釜鱠兼和劑吻愁玄豹摧峯掣紫駝秋
深沙苑菟霜落洞庭鮪細膩殷紅玉芳蕤淨碧莎
那能雙玉筴秣辱縷金陀小食歆三臭迴思感萬
疴巖庭風感烈幽壘日蹉跎繫鴈窺前浦啼鳥想
故柯通宵從鼯鼠入夜戲天魔燥髮紛難解胼肌
厲可摩永懷天吏伏拭淚使星軻海運虛垂翅雲

身早見羅襴衡愁正苦阮籍醉如何歲暮誰堪健
風塵鬢欲皤凌虛疑海嶠曳履想岷峨謬望斜州
錫不成彭蠡蓑青雲思桂樹春月罷松蘿猿鶴三
年夢琴樽一夕俄明公寬節制雨露得滂沱犬馬
如留齒神光報泰阿

七言排律

酬華大餽飯

班固大家能著作陸機英妙負文雄兩都賦有凌
雲氣擬古詩高曠代風馳馬早延通籍譽才華應
見古人同燕王臺館愁鄒衍晉室衣冠有阿戎書

豈萬言天險峻飯傳一飽畏途窮世經豺虎催頭
白路難驛駟灑血紅西哭幾湮秦帝闕南冠虛憶
楚江楓投君劍氣不得死猶倚崆峒百丈虹

五言律詩

山居

懶慢無人地經時景不違貪飽魚暗動掠水燕爭
飛搗藥雲舂碓移花露濕衣山陽幽適好日暮澹
忘歸

浮丘院壁

洞口春雲薄桃花一水香金壇凝夜露玉盃出瓊

漿河上僊人遠洲中紫氣翔何當着雙鳥為覓費
長房

大名故城

魏郡遺空壘蒼蒼接水湄鴈衝斜鳥陣柳拂捲龍
旂樓閣青雲恨陂塘白日悲北門無鎖鑰腸斷立
郊垂

過邯鄲作

趙庭虛廟畧雄長竟誰名國破歸秦帝城亡插漢
旌山河猶壯麗豪俠失縱橫回首傷心地春林轉
暮鶯

送友人入秦二首

春日催行憶花明
旅鴈還燕陵
青嶂外秦樹白雲
邊解劍酬知己
傾尊倚別筵
關河他日望芳草思
芊芊

又

整轡東辭闕
還家西入秦
雲烟三晉合
風雨二陵
頻鳥道斜連漢
龍山暗度春
壯遊看寶劍
萬里蹋妖塵

上張鄧西明府三首

燕關寒日薄
漳曲早冰澌
白髮親闈暮
青春子病

危殷憂聞鼓角
想像見旌旗
遙識齊王相
能憐越石悲

又

刀斗催嚴署
秋風蘇肺肝
冤冤幽共語
魑魅喜相
看丞相何多畏
將軍久失餐
金雞應有詔
衰謝一時寬

又

御史清霜鉞
危腸結禍胎
敢辭豺虎餉
無異犬羊
材魏闕書難上
秦庭哭未回
條風吹北極
天意起寒灰

喜得釋獄消息

聞道真州信霜臺霽夕威春陽元自動草木已含
輝妻子愁看在鄉關喜不違遣心翻太惡俛首涕
霑衣

卽事

薄暮轉蕭瑟經心常苦悲驚枝鳥不定斜嶺月生
遲冥思空林數春雲時蔽虧謬言隨偃蹇不敢畏
支離

戲寄孟龍川

舊日浮丘伯曾將王子喬周遊乘白鶴接引上青

霄大藥留丹鼎天台度石橋不知千載後爲爾一
相邀

送張壚山還蜀

朝思蜀艸綠夜見漢鴻飛溪縣青春滿山關紫氣
圍飲餘看寶劍歌罷弄金徽別去應相憶銅梁音
信稀

喜還舊業草堂

漢節雲間任秋風送我還荷恩思聖主悔難自皇
天臺沼看今日松筠去幾年草玄吾未老應許萬
人傳

登天臺山有感兼呈張嶺山

天風吹斷壑秋色渺荒臺浩蕩江河去蒼茫日月
迴傷心經絕險回首起重隈欲盡登高興慚余作
賦才

服闕口號上張鄧西明府兼呈吳少槐吏部李

東岡翰林二首

際會驚何代支離過此生親宮無宿草子位遠含
情未敢衣純綵誰能痛失聲廿年當此夕天地忽
頽傾

又

獄久年三換刑深鬢二毛愁淹天畔日淚作海門
濤寸草傷春碧慈烏近夜號感時思雨露回首望
旌旄

聞吳吏部少槐哀僕乏嗣飭內入獄侍湯藥

四首

宓子彈琴日山濤謫宦時澤梁弛禁網鰥寡遂恩
私未識洪鈞妙應霑造物奇周南王化遠終不負
螽斯

又

落日低荒戍天風鎖禁庭正愁秋隴斷誰啓夜臺

局宜母苗堪摘王孫草尚青使君佇高駕引領濕
長纓

又

天豈蒼蒼色川仍脉脉流乾坤一物在日月此生
浮巖考曾無壘哀殤已故丘何心望河漢牛女度
清秋

又

晉室嵇中散陳留蔡議郎彈琴神不去續史恨何
長慘淡悲千古淒其滯此方翻思兒女意斷盡九
迴腸

冬夜遣悶三首呈吳少槐吏部

鬢氣浮銅柱霜威折玉衡愁看蟾影沒病與兔
清辭賦憎關世存亡憶結纓鄒陽書再上愈覺寸
心傾

又

芾芾梧桐影紛紛荆棘墻徐看侵鐵鎖不比落銀
牀物色渾如此吾生可共傷那堪聞玉笛風力更
清商

又

鐘鼓何相報謹呼促警齊仗嚴妨落月析罷爭鳴

雞計過疑疎濶才輕敢怨攜漢庭循吏在何必嘆
羈棲

哭董縣丞紳

丞彊幹任事清苦厲節有古人風壬寅歲長
揖恤刑沈法曹抗救洗冤於柙居甚今茲長往
柙安得不悲故詩以哭之

十月黃河穩天寒素舸孤斷雲低不去哀鴈起相
呼忽暗郎官宿虛傳太史鳧哭君重回首愁色滿
蒼梧

又

列郡開方藥嚴墻阻別離蒼生猶有待逝者竟如
斯老去傷心地愁邊失望時玉棺誰爲殮蕭瑟九
原思

又

哀挽宜陽路銘旌汴水風青驛傳海上白鶴果遼
東抗救邀天使鈞裁秉帝衷愚民痛一哭雪涕灑
寒空

初月

雪霽樓空夕寒輕月欲明素魄升海上殘朧傍人
清桂樹春應發蟾蜍夜自生傷心望牛斗流恨滿

山城

示外弟陳可

阮籍何窮軌陳生已着鞭朔鷹秋始健宛馬血方
妍不負儒林傳寧玄弟子負五車如破的萬里看
騰騫

送劉少尹赴興州經歷三首

宸極霑仙籍雙鳧別尚方何如魏賓客不減漢循
良大府宜方噐牙門足薦章材高豈伏櫪萬里見
乘黃

又

潘岳花封宰陳琳將幕材檄文傳萬壘列宿近三
台悵望薊門路深懷河朔杯君王求駿骨待詔上

燕臺

又

大府元戎騎長驅引萬羣共迎劉記室喜得郗叅
軍燕月排弓影胡霜綴鎧文知君閭廟畧一嘯洒
天氣

秋夜奉懷王鳳洲比部

獨坐秋城夜長歌憶鳳遊帝鄉臨紫浦仙吹下炎
洲早食琪玕樹西巢雲綺樓無緣近苞彩慰此別

離憂

寄上徐龍灣比部

相思木葉落迢迢起重哀
翰海雲初斷盧龍秋正
來慚無國士報獨憶鳳城隈
坐令生華髮臨風一
痛哉

贈王少府封君水亭

長嘯下江閣披襟卽水亭
魚龍淨秋浪舟楫倚寒
汀且失干戈苦還依社稷
靈夜來看紫氣光滿少
微星

贈王龍池別駕

晉石分青嶂龍池抱紫臺
秋風動鱗甲白日發雲
雷太液濤休險昆明勢欲迴
何當洗兵馬萬里絕
氛埃

夏日同王大伾董右坡張嶺山陸夢洲孟龍
川登大伾山覽黃河故道得溫字

五月隨僊鳥凌風勢欲騫
却思乘海鶴翻憶聽秋
猿石樹穿雲冷巖花散酒
溫大河猶在眼何必問
崑崙

西巖

西巖雙柏樹猶自倚青壇
舊識洪河險曾經大壑

寒龍鱗剝雷雨鵲榦瀉風湍回首思梁棟還驚際
會難

題楊太尉揮金幅幃

獸憶關西老揮金氣尚奇江河流浩瀚天地眇端
倪諫草危時恨亭臯絕代悲由來圖繪意不盡史
臣辭

畫葡萄

漢使尋源後蒲萄滿舊宮如何尺素裏枝葉往時
同滾露啣空碧搏烟射小紅誰能貯萬斛遠寄日
華東

贈謝山人四溟

春桂綠華滋芬芳合待時君今餌玉葉聊以駐僊
姿擬著三湘賦深題五嶽詩相期共方眼爲覓葛
洪陂

遊成臯王城南園見水石漁艇

不作江南客空餘江上山水同明月靜石似白鷗
閒僂徑松蘿外漁舟蘆荻間相看渾忘却無復住
人寰

七言律詩

出塞

城門伐鼓日欲墮西山返照入平蕪玉關秋動氣
橫塞交河霜冷夜愁胡健兒風吹白豹障將軍雪
壓金僕姑晝傳羽檄連雲戍夜發精兵到海隅

慈壽宮

漢宮羅列倚雲霄鳳翥龍飛積翠遙東矚扶桑延
日觀西連雪嶺入寒宵皇輿拜舞臨黃道仙仗續
紛觀紫朝諸將謾勞繁鼓角至尊今已奏簫韶

浮丘精舍

衛河東岸浮丘高竹舍雲居隱鳳毛遂有文章驚
董賈豈無名譽駕劉曹秋天散步青山郭春日催

詩白兔毫醉倚湛盧時一嘯長風萬里破洪濤

書長春觀二首

萬里天風海水高三山不動駕羣鰲青霄漠漠聞
鸞嘯白日翩翩見鶴翔巖下瓊漿留衛叔山中瑤
草寄盧敖懷紆金紫人間事日日吹笙對碧莢

又

天門曲出海雲蒸碧殿霞綃山氣層羸女吹簫乘
夜月茅君騎鶴下秋燈金莖玉露生華髮紫極丹
書接上昇緱氏山頭一揮手幾觀滄海變峻嶒

贈李金吾口號

漢家飛將李將軍三十承恩淨虜氛馬蹀金微橫
朔氣箭傳青海動燕雲陰風漫捲賢王陣大雪長
驅突厥羣未信封侯縣鵠印已頒新使煥龍文

七夕

去年七夕登浮丘今年七夕客燕州仙槎獨憶銀
河水桂樹誰看玉露秋葉下井牀驚別淚蟲吟花
檻送深愁平生自信庾開府懷抱于今賦遠遊

挽楊六坡推府

草閣談玄不復聞山陽鍛後涕交紛十年辭藻漢
京事萬里鄉關秦塞雲尹喜傳經空汝待王喬飛

烏竟詛羣荒墳靜鎖任山麓日暮遙悲渭水紋坡

閩右人好丹液
術客死於瘡

除夜寓大名寄孟龍川

忽憶襄陽孟浩然風流名與太湖連沙村遠近青
春酒山舍週迴白石田何處椒花能媚頌他鄉綵
勝舞隨筵思君獨步清漳曲南望鳧銷倍愴然

古意

漢苑春繁鎖縹紗銀牕嬌小護僊葩朝雲裊裊行
清曉落月娟娟見玉華湘女漫彈瑤瑟怨天孫虛
憶紫烟槎使君五馬何軒豁佇望郊端柘影斜

贈關中陳一泉廣文二首

漢輔金墉百二關千秋王氣鎖南山忠良苦憶蕭
陳侶豪俊還生涇渭間會有文星通帝座豈愁仙
履綴鸚班春宮首藉何辭長鳳陛圭璋可待攀

又

魏闕恩光落上台龍門賓客會羣材太玄無媿侯
巴誦九辨何勞宋玉哀江漢秋容松葉澹宮墻春
雨杏花開明時擬有石渠詔翰苑驚看補袞裁

憶昔寄錢同野第

憶昔讀書住石城青天對落兩山橫江潭夜傍魚

龍宿軒牖晨看日月生多病浸淫漢司馬著書憂
憤趙虞卿匡廬舊約空回首腸斷清宵淚濕纓

宿沙口贈王比沙二律

谷口寒雲擁北沙柴門深鎖待春華楚騷自合千
人誦漢水猶懸八月槎賈誼匡君頻痛哭楊雄識
字著名家相逢媿我垂雙鬢潦倒青罇海日斜

又

魏郡西連沙口原故人高卧倚晴軒黃雞碧酒須
多事楚些吳歛可細論豺虎空村當落日魚龍入
夜漫孤翻自愁騎馬衝寒塞古木蕭森起斷猿

九日奉懷謝四溟逸人兼酬往日見寄之作
鄴中辭客古今才千里秋深發興哀陶令行藏只
盡醉孟嘉容止歎清裁山萸細細團風裊園菊亭
亭滯雨開白首思君何處望煙雲苦憶魏三臺

奉和王大伾侍御題周紫泉東山艸堂二律
石壁巉巖一徑幽漫隨杖屨訪林丘嵇康不負山
陽隱謝傅能忘淝水籌日落滄洲時佇望天寒桂
樹且淹留徵書旦暮馳秋隴擬取高名別代收

又

海門秋動青澶麓天畔風高白草堂太傅松楸高
下見繡衣旌節往來常窺軒細篠娟娟碧截壁孤
雲裊裊長薄暮翠微歸興嬾暫隨流水一揮觴

震岡集留別

城闕秋還白露清十年懷抱與君傾彈琴細憶嵇
中散痛哭猶憐阮步兵絕巘松枝元自峻經時花
盡爲誰明開罇莫負中宵賞別去愁看銀漢橫

秋日懷錢同野

象魏獨憐秋氣清苦垂冤頸且長纓背巢寒鳥經
年別出塞浮雲盡日橫鮑叔衣冠頻悵望爾衡詞
賦已吞聲滄洲憶汝傷心極坐嘯驚看白髮生

送林越山廣文之石城尹二首

粵海炎洲氣未踈高涼快爽此安居蔡彤有待殊
方詔虞詡終收太史書茂嶺秋深纔見鴈廉江水
緩自生魚慎時努力加餐飯返浦看乘白鷺車

又

漢節遙分南海邊天風獵獵擁樓船蒼梧雲盡山
如戟合浦春回樹若烟占歲豈應綠戍日兢歌何
用勝于闐遐阯亦是藩王地賴爾文翁治化賢

贈徐少尹

峒嶼中山插泰清斷巖西影下層城彈琴不去人

吏散岸幘何勞官長迎縣竹土風今變態黑山盜
賊敢橫行檣材慙媿河陽賦坐起青霄望弁纓

赴理大名道中感李有池惠粟之作

關塞遙憐霜露清燕雲漠漠鎖層城鄒陽不盡十
年淚鮑叔猶深萬古情秋水魚龍休悵望春風鸞
雀賴生成酬恩欲擬愁難賦坐嘆空垂白髮莖

聞比部李滄溟出守順德書此寄上

漢署仙郎何處求高旌知駐古邢州漁陽久待張
君淑河內爭迎郭細侯舊日石門曾拒壘此時銅
馬莫輕謀畏途遠附青雲翼慷慨長吟寄壯遊

立春前夜宴張壚山明府宅

城柝傳聞客子夕清罇一發便宜人巴江水汎雲
邊臘壚嶽天開雪後春避地衣冠從嬾慢驚時花
鳥自逡巡媿知張翰留顏色擬許盧敖隱釣綸

醉後射魚宿羅山人草堂

南射滄溟十丈魚碧潭搖影動清虛太行遠望仙
人嶂淇水斜臨高士居曉傍楓巖留客飯夜歸蘿
徑卽吾廬何時共策青藜杖爲覓中山白鹿車

觀妓卽席走筆

楚女東隣未是過秋來休似隔銀河香鬟小學平

陽舞艷曲低翻子夜歌弄日鴛鴦窺綺幔偷春蛺
蝶趁花羅大堤此夕堪腸斷回首猶憐逝水波

舊黃河道中有懷張壚山明府

黃河渡口舊飛湍白馬東連瓠子灘
及后山川餘

斷石漢皇巡幸咽回鑿寒沙滾滾龍
北動晚日蕭

蕭鴈驚乾慨古思君易搖落秋風更送紫騮鞍

贈羅月巖推府迎侍還萬安二首

漢京仙客知名早佐郡驚看漳水濱南楚花明萊
子服西山樹送狄公雲高秋大澤竈
地隱落日寒
江鼓角聞鼙是少微干象緯天風生
報洞庭君

又

燕塞霜空萬木摧
楚鄉烟淨錦帆回
洲如白鷺天邊落
山似青螺海上來
孫晷蘭輿元水國
曹家僊賦在銅臺
南雲北渚休相憶
紫誥金泥次第開

春晚將還舊業
諸公送遠獨方水雲以病不

至作此留別

青春載酒尋君處
君病春殘我亦回
背葉流鶯愁對語
捎泥乳燕恹飛迴
烟雲莽莽高歡壘
日月荒荒魏武臺
醉裏劍歌時自放
白頭還望轉堪哀

登南城樓有感兼懷荀前川

獨上高樓四望明
海天愁色起縱橫
黃雲不斷飛狐塞
殺氣遙連偃月城
未訝健兒能陷虜
早聞白羽尚徵兵
封侯知有荀公達
好向中朝事請纓

五言絕句

山雨五首

日落石窓時
林花起幽色
不敢窺蛟龍
雨昏潭影

黑

又

朝着山作雲
暮看山作雨
幽人期不來
踟躕望江

奇

又

秋水作鳴濤瀉入秋山下大石橫絕梁小石流空野

又

峽雨晝不絕暝煙沉孤嶂徘徊山中人苔蘚生衣上

又

門前黃岡陂能長青瑯玕夜來溪雨惡流作白石灘

示從弟橋三首

鴻鴈隔春水鵲鴿宿淺沙翻飛共遲暮終爾棲雲霞

又

吾家白玉樹璀璨已橫枝儘可參霄漢莫教傷別離

又

莫向蒼山宿蒼山古木橫風動連枝影淒其傷爾情

寄高貞庵明府二首

隴水鳴幽咽隴山不可攀何緣牽夢到夜夜繞秦

關

又

隴坻千萬里
悵望使人迷
願作青鸚鵡
能言向隴西

七言絕句

別冀康川進士口號

秋風七月動
燕關雲散金
臺遊子還欲
上高樓重
愁思海濤東
望阻天山

長春觀二首

瀛海可雲見
帝丘玉炁浮
動五城樓茅
君借我山

中鶴飛上天門看九州

又

紫極清壇道士家
閑騎白鹿弄雲霞
蕭臺旖旎金光草
春殿虛無玉樹花

青樓詞

百尺高樓掛彩烟
錦箏銀甲亂哀絃
夕陽欲下簾
深捲望見西江萬里船

雲中曲八首

將軍羽箭射天山
閃日旌旗出漢關
夜月欲開青海嶂
秋風先到白龍灣

又

燕岱河山黑水分胡沙北望接氤氲桑乾斜映龍
山月碣石遙通魚海雲

又

元戎幕府倚天開將校星纏四下迴漢壘天成標
漢旆雲州日轉作雲臺

又

高闕塞頭殺氣橫居延川內少人行黃沙欲沒李
陵墓明月長懸蘇武城

又

半夜飛書報建章交河新駐左賢王卽分驍騎屯
榆塞便發元戎出定襄

又

大將遙分西顧憂魚腸寶劍雪花流陰風漫捲賢
王陣白纛魯縣克汗頭

又

黃鬚羽帽破烏桓丈八蛇矛血未乾胡馬盡歸元
帥幕蕃刀贈與故人看

又

白馬青裘海上來自言家住古秦淮封侯未遂爲

人下沙漠橫行恐見猜

戲贈于山泉

楚王宮殿鎖寒暉
瑤草金花匝四圍
十二巫山覓不見
滿天雲雨濕僊衣

贈衛川居士

衛川南望多白雲
滄洲落葉各紛紛
何時咲入烟霞去
醉裏常隨麋鹿羣

送王盱山還保定

君去青山挹紫氛
我亦南還弄彩雲
相逢美酒不成醉
別去空憐落鴈羣

秋興漫成六絕句

壁峭江深雲物明
沙村秋氣轉初清
出門散着雙蓬鬢
醉舞酣歌太放情

又

天外晴山色不移
苑邊衰柳駐遊絲
沙平細履無人見
恰似青春二月時

又

絕巘寒藤垂古月
秋江過雨濕仙花
柴門幽興尤堪賞
徧遣銀壺賒酒家

又

當堦松樹何楚楚
黠葉蒼枝已傲霜
要須見汝作
梁棟桃李春華休擅場

又

柴門反鎖對秋城
獸樹花開眼自明
但使濁醪常
醉汝向來車馬不須迎

又

買茅藉宇非無地
簷花澗石錯相鮮
西隣野老憐
踈放數借風亭涼處眠

衛河漲二首

河隍東望似東洋
簸蕩中流日月光
漁子舟人頻

顧盼恰如五月下瞿塘

又

瓠子煙波橫九灘
淇園蒼竹斬千竿
何如此日風
濤惡灑雪衝颺作海湍

寄孟龍川絕句

燕郊六月起穉霜
地振山傾薄日光
吁嗟風雲那
有此黃金臺下斷人腸

西山集宴

山作屏風襍錦苔
鳳笙龍管遞相催
若非緱氏山
頭飲擬有僊人海上來

對勘呈吳少槐吏部

漢法終憐天地寬
楚囚何恨歲時難
肯教細艸隨霜死
願借春光及暮寒

獄夜

城頭烏雀飛欲棲
樓上驪聲四下齊
一夜霜風吹不盡
滿庭秋色使人迷

聞華從化誦李中麓樂府詞有憶寄上四首
漢庭協律按新聲
曲度梅花散月明
拂拭青天垂手舞
相思遙寄鳳凰城

又

鼻倩西辭金馬門
酣歌特地引芳樽
海上長謡王母宴
人間謫得歲星蒐

又

東望山東中麓山
赤城霞送主人還
忽聞醉裏松風曲
恰似劉伶善閉關

又

麟閣虛傳身後名
琴臺貰酒自須傾
颯沓結風成楚舞
歌唵綠水勝秦聲

謝華竹川酒肴二首

淮陰市頭惡少喧
騰下之辱詎可言
漂母屢出金

盤食白沙綠水哀王孫

又

燕國舊飲金盤露章丘今見玉壺春烟霞去住不
相似笑殺中山賣酒人

宿沙河值雪同蔡百戶作此

南雲漠漠鎖天荒北雪霏霏暗北堂日暮角聲吹
出塞沙河愁殺蔡中郎

丁未夢中遊王西軒園作是歲十一月二十
日獄吏譚遵令獄卒蔡賢笞柙數百謀以
土囊壓紉之官覺之免

秋日園林一蹙過桃花默默鎖空蘿歌聲漫逐浮
雲去不覺霜風兩鬢多

憶內

蘇武霜旌辭漢關李陵沙漠去無還舊時亦有金
閨淚何似今朝爾別顏

贈內二首

蘇武匈奴十九年相思知在海雲邊上林鴻鴈啣
尺素寄汝秋風玉塞前

又

君身似是杞梁妻玉貌絨情只自啼幾時哭到梁

山月携手青雲入會稽

內寄衣

吳江白紵雪絲裘不惜春芳細艸薰玉手裁縫誰
得見金刀一剪斷行雲

與張山人雲谷對飲言別

海上曾留赤玉鳥山中今共紫霞卮相逢暫爾各
飛去颯颯天風駕彩螭

代邊騎

駢弓貫臂箭橫腰慣射山陰雪後鵬欲假金笳鳴
出塞不知誰是漢驃姚

訪海月上人不遇

錫杖到來知幾日天花落盡鎖春山柴門流水不
相顧漠漠烟雲送我還

圖書

川圖
藏書

五五八八八八八八

